

EPISTULA LEONINA

CLII

HEBDOMADALE
PERIODICUM LATINĒ SCRIPTUM,
QUOD ĒDITUR
E DOMO EDITORIĀ INTERRETIALI
CUI NOMEN EST
LEO LATINUS



<http://www.leolatinus.de/>

N.B.! EPISTULAS LEONINAS ACCIPIS **GRATIS** ET **SINE ULLĀ OBLIGATIONE**. NAM LEO LATINUS PUTAT HOMINIBUS LATINAM LINGUAM DISCENTIBUS AUT DOCENTIBUS CORDI ESSE VERBA LATINA. **SI TAMEN TALES EPISTULAS ACCIPERE NON VIS, RESCRIBE HOC NOBIS: TUM STATIM NOMEN TUUM EX INDICE ACCEPTORUM TOLLEMUS.**

HŌC TEMPORE DUO FERĒ MILIA HOMINUM LATINĒ DOCTORUM ACCIPIUNT EPISTULAS LEONINAS ELECTRONICĒ MISSAS. EPISTULAS LEONINAS **I-CLI** INVENIES IN INTERRETI SUB HAC INSCRIPTIONE, QUAE SEQUITUR:

<http://ephemeris.alcuinus.net/leonina/>

MAXIMĒ ID CURAMUS, UT COPIAM VERBORUM LATINORUM CONVENIENTER AUGEAMUS ET TEXTŪS MODERNOS CUIUSVIS ARGUMENTI QUAM OPTIMĒ IN LATINUM SERMONEM CONVERTAMUS.

ROGATUR, UT MANUSCRIPTA MITTANTUR VIĀ ELECTRONICĀ. MENDA SIVE GRAMMATICA SIVE METRICA, QUOAD FIERI POTEST, TACITĒ TOLLUNTUR.

EN HABES EPISTULAM LEONINAM
CENTESIMAM QUINQUAGESIMAM SECUNDAM (152) !

ARGUMENTA

EX ORIENTE LUX (II) –

Quid sentiant Europaei orientales de crisi profugorum

1. *Vaclav Klaus* praeses quondam Tsechiae.....04 - 06
2. *Richard Sulik* Slovacus legatus Unionis Europaeae.....07 - 09
3. *Alexandra Rybinska* Polona diurnaria.....10 - 11

5. ECHUS VOCES

- 5.1 Hannes Demming: De pistoriâ voluptate migrandi.....12-13
- 5.2 Hannes Demming: Chronogramma in Epistulam Leoninam CL.....14
- 5.3. József Kovács: De statu Hungariae.....15-16
- 5.4 N.N.: De Orbani »democratiâ illiberali«.....17
- 5.5. Fidelis Rädle: De Epistulae Leoninae nimiâ abundantîâ17
- 5.6 Ioannes Teresi: Bibulis vinis (carmen).....18-19

LEO LATINUS OMNIBUS HOMINIBUS LATINITATEM AMANTIBUS
SAL.PL.DIC.

Cara Lectrix, Care Lector,

maximê gaudeo, quod mihi licet Tibi offerre Epistulam Leoninam centesimam quinquagesimam secundam. – Iterum agitur de nationibus Europae orientalibus; haud inutile mihi esse videtur, quid de profugis (quales adhuc dicuntur) recipiendis dicunt Tsechi et Slovaci et Poloni. Audiatur et altera pars! - Addidi nonnulla a lectoribus scripta; inter quos eminent Hannes Demming qui canticum popolare Latinê reddidit necnon chronogramma composuit in Epistulam Leoninam Centesimam Quinquagesimam. Plaudite!

Quae cum ita sint, hanc Epistulam Leoninam 152 tolle et lege et laetare et ... fideliter pergas legere Epistulas meas!

Medullitus Te salutat
Nicolaus Groß
Sodalis Academiae Latinitati Fovendae



<http://www.leolatinus.com/>

LEO LATINUS

Senden ex oppidulo Bavariae Suebicae,

Die Dominicâ, 04. m.Febr. a.2018

EX ORIENTE LUX (II)



MERKELIAM EUROPAE BENEVOLENTEM INFERRE DAMNUM¹



Václav Klaus, qui hunc textum scripsit, ab a.2003 usque ad a.2013 fuit praeses Tsechiae

¹ orig. MERKEL ERWEIST EUROPA EINEN BÄRENDIENST.

Merkeliam benevolentem Europae inferre damnum

Haec symbola, quam scripsit Václav Klaus, publicata est d.20. m.Sept. a.2015

Quantus error: Germani credunt migratores integrari posse sine ulla difficultate. Qui stupefient – necnon Unionem Europaeam adducent in magnas difficultates.

Disputatio, quae ferê totâ in Europâ, sed praesertim in Germaniâ nunc fit de *admigratione massali*¹ (i.e. collecticiâ, non individuali) et cuius fundamenta ponuntur in notione *profugi*², pro eo, ut ponantur in *migratoris*, ut potius dicam, *migratoris oeconomici*³, est parum sincera hominesque inducit in errorem necnon propter *politicam* suam *rectitudinem* exaggeratam est quodammodo suicidalis⁴.

Scientistae sociales nos docent (qui hîc in casu – quod raro fit – consentiunt cum sanâ mente humanâ) nullam societatem expeditê et efficaciter et necessariâ cum stabilitate posse operari, nisi eadem intrinsecus cohaereat. Oeconomi in hac re loquuntur de *capitali humano atque sociali*, sine quo non fiat res publica valida atque efficax.

Controversiâ, quae hodie fit de admigratione, hae res verae et fundamentales ignorantur. Ideologi ideologiâ multiculturalismi nebulosâ caligantes⁵ putant huic rei difficultatem inesse nullam. Qui credunt fieri posse, ut societates singularum civitatum Europae sine ullâ difficultate „suppleantur“ migratoribus.

Admigrationem adhiberi tamquam maltham, quâ Europa condensetur⁶

Itaque vix mirum est hos viros politicos nequaquam operam dare, ut undam migratoriam praesentem sistant. Qui nihil student nisi illam

¹ *admigratiō massālis, orig. *massenhafte Zuwanderung*. cfr PLAUT.Persa 347 si ad paupertatem admigrant infamiae. -

² profugus, -ī m., orig. *Flüchtling*.

³ migrātor oeconomicus, orig. *ökonomisch motivierter Migrant*. cfr migrator, -oris m. Georges, Lateinisch-deutsches Handwörterbuch, 14.ed., Darmstadt 1976, tom.II, col.916: „migrātor, -ōris m. (migro) = μετανάστης, der Auswanderer, Ansiedler, GLOSS.II, 369, 21“

⁴ propter *politicam* suam *rectitudinem* exaggeratam est quodammodo suicidalis. orig. *durch ihre übertriebene political correctness sogar geradezu selbstmörderisch*. *suicidiālis, -e cfr homicidialis.

⁵ Ideologi ideologiâ multiculturalismi nebulosâ caligantes. orig. *Die von der Ideologie des Multikulturalismus benebelten Ideologen*.

⁶ orig. *Migranten als Kittmittel für Europa*.

quoquo modo perferunt – sive pecuniâ dandâ, sive salutatione affabili sive receptaculis praebendis sive, idque maximê, meliore victu promittendo.

Quare hoc fit? Hoc loco verba afferam collegae mei *Jiri Weigl*, talem „rationem politicam salutandi“ eo ipso fine fieri, ut cohaerentia societatum Europae, quae nunc exstent, efficaciter destruat. Nam isti politici „novam“ suam „Europam“ construere non poterunt nisi in illarum parietinis naufragiisque – scilicet sine nobis, qui simus contenti Europa, quae nunc exstat. *Weigl* enim sentit constructores novae Europae id studere, ut e migratoribus fierent primi „consortes nationis europaeae somniando effictae“.

Migratores cum nullo modo coniuncti essent cum aliquâ civitatum Europae praesentium, multo simplicius semet ipsos posse habere pro consortibus novae Europae multiculturalisticae. Admigrationem adhiberi tamquam maltham, quâ Europa condensetur.

Error Germanorum fatalis

Alia autem causa, qua multi politici europaei, praesertim germani sic se gerant, nescio an sit quaedam simplicitas animi, qua illi credant admigrationem massalem per breve quidem tempus habituram esse quosdam effectus iniucundos, sed per longius tempus evasuram esse in nullas res nisi bonas et fructuosas. Iste enim est error fatalis.

HAEC SYMBOLA, QUAM SCRIPSIT

VACLAV KLAUS

PRAESES QUONDAM TSECHIAE,

D.20. M.SEPT. A .2015 PUBLICATA EST

IN EPHEMERIDE GERMANICA,

C.T. WELT.

<https://www.unzensuriert.at/content/0019841-EU-Abgeordneter-Sulik-zu-Fluechtlingen-Warum-sollen-wir-uns-die-Probleme-ins-Land>

Richardus Sulik legatus Unionis Europaeae Slovacus de profugis recipiendis: »Quid est causae, cur problemata inferamus terrae nostrae?«



Richardus Sulik Slovacus legatus Unionis Europaeae *Angulam Merkel* vituperat, quod ignorare videtur Unionem Europaeam in re profugorum politicâ inhabilem esse ad agendum. d.25. m.Ian. a.2016 – h.17:34

Richardus Sulik Slovacus legatus Unionis Europaeae a relatore stationis radiophonicae *Deutschlandfunk* de re profugorum politicâ interrogatus: »Omnes« inquit »hoc vident, praeter Dominam Merkel.« *Richardus Sulik* Unionem Europaeam putat esse »inhabilem« - et *Angulae Merkel* cancellariae foederali obicit, quod hoc non respiciat. Idem non vult permittere, ut terra sua propria ineatur a migratoribus. Synthēma¹ partis suae politicae, quod est "Libertas et solidaritas", non valere nisi ad cives Slovacos.

Socialistas nolle muslimos

Cum gubernatio Austriae foederalis in rebus profugorum politicis haesitet incerta, quidnam faciat dicatve, hic politicus Slovacus loquitur clare atque aperte: Post noctem illam Coloniensem, qua mulieres violenter subigitatae essent, praevideri posse, quid accidat. Richardus

¹ synthēma, -atis n. *Motto*.

Sulik quaerit, quidnam causae esse, cur Slovaci terrae suae inferant talia problemata? Aliter ac partem gubernationis politicam socialidemocraticam, quae – sane mirum! – annuntiavisset se nullos iam profugos muslimicos Slovaciâ inire permissuram esse, suam partem synthemate Libertatis et solidaritatis denominatam omnes migratores recusare, „sive muslimos sive alios“.

Gubernatio partis sinistrae populistica

Richardus Sulik a relatore stationis *Deutschlandfunk* interrogatus, cur Slovacia in rebus profugorum politicis diiudicaret tam acriter, dixit haec:

Vide apud nos post sex septimanas factum iri electiones parlamenti, et gubernationem socialisticam esse satis populisticam. Quod annuntiaverunt de muslimis, iam paululo est plus quam originaliter sibi proposuerant.

Deinde relator ipsius *Deutschlandfunk*: *Tuane pars politica reciperet muslimos?* Richardus autem respondit haec:

Non, nos migratores recusamus. Equidem non curo, utrum iidem sint muslimi necne. Nos recusamus migratores variis de causis, nec nobis necessarium est distinguere muslimos a non-muslimis.

Mirum quoque est, quod Richardus dicit de pecuniis Unionis Europaeae et de spatio Schengeniano. Idem enim sentit Slovaciae abstinere posse a miliardis Bruxellensibus accipiendis. Pecuniis Unionis Europaeae accipiendis cum facta esset „ingens corruptio ingensque deformatio“, in fine Slovacos lucrum habere fere nullum. Sine subventionibus Unionis Europaeae futurum fuisse, ut Slovacia non multo pauperior esset, sed "non essemus ollae Bruxellensi obnoxii".

Blateratio Bruxellensis

Diurnaria autem ipsius *Deutschlandfunk* scire vult, nonne hac sententia Sulikiana vehementer impediatur, ne Europa coalescat. Tum Richardus: „Istaec nihil est nisi blateratio Bruxellensis. Non necessaria est pecunia, ut nationes coalescant. Mercatus communis praevalet. Qui non directê constat pecuniâ, sed oportet fiant

conventiones et foedera," Sic sentit legatus Unionis Europaeae, qui finem quoque spatii Schengeniani non timeat:

Si condicionem consideraveris, quae valuit ante viginti aut triginta annos, videbis illo iam tempore fuisse mercatum internum, neque eundem fuisse valde malum, sed nondum fuisse Conventum Schengenianum (de limitum custodia abolenda). Unum et aliud non directe inter se cohaerent. Bonum quidem est exstare Conventum Schengenianum, sed hodie Conventum Schengenianum partim est sublatum: Suetia, Dania, Austria, Italia – hae terrae sic quoque non iam vere insunt spatio Schengeniano, quia eaedem limites custodiunt. Et pergunt hoc facere.

**HOC COLLOQUIUM, QUOD RELATOR
STATIONIS RADIOPHONICAE
«DEUTSCHLANDFUNK»
FECIT CUM RICHARDO SULIK
SLOVACO LEGATO UNIONIS EUROPAEAE
D.25. M. IAN. A .2016 PUBLICATA EST
IN
AUSTRIACA EPHEMERIDE RETIALI,
C.T. UNZENSURIERT**

Alexandra Rybinska Polona

diurnaria Germanae moderatrici televisificae explicat, quomodo operetur democratia

<https://www.youtube.com/watch?v=ZaZKsPwVYYU>



Alexandra Rybinska Polona diurnaria explicat gubernationi Polonicae respiciendam esse sententiam Polonorum, ut iterum eligatur.

DE PROFUGIS (quales adhuc officialiter dicuntur) IN EUROPA DISTRIBUTUENDIS QUID SENTIANT POLONI

Moderatrix: ... Quidnam fieret de Polonia? Potestne fieri, ut Polonia dicat: ‚Bene, si ita est, nos quoque aliquot (sc. profugos) recipiamus’, si quidem valeret ratio voluntaria?’

Rybinska: Populus Polonorum istam rem valde recusat. Poloni nolunt recipere profugos. Quod etiam saepe explicui in colloquiis cum diurnariis in Germaniâ habitis. Quod quadamtenus sequitur rationem

logicam ex eventu suffragiorum, i.e., gubernatio, quae aliquid facit, quod voluntati populi est contrarium, non iterum eligitur.

Moderatrix: At tamen vultis accipere pecunias a Bruxellensibus solutas?

Rybinska: En argumentum illud pecuniae Bruxellis solutae. At si calculationes reverâ consideraveris, intelleges nos, cum mercatum nostrum aperuerimus etiam pro negotiationibus germanis, necnon simus earum allatores, ita ut ex omni eurone, quem nos accipimus, undenonaginta centia reveniunt in Germaniam. Unio Europaea non operatur secundum illud argumentum. Ergo non fit distributio pecuniae secundum synthema q.e. ‚Vos hoc accipitis’ et causa est finita.

Moderatrix: Tamen concedis nationem tuam Unionis Europaeae cum particeps sit, emolumentum accipere?

Rybinska: Scilicet. Omnes Unionis Europaeae participes accipiunt quoddam emolumentum. At tamen non licet voluntatem hominum negligere. Audi, quid responderint Poloni de profugis interrogati: Si generaliter agitur de profugis recipiendis, dimidia ferê pars Polonorum assentitur. At si quaeritur, num recipiendi sint profugi fidei muslimicae, septuagenae centesimae (70%) hoc recusant. Hoc quoque est respiciendum. Itaque e.g. pars politica, quae appellatur *Kukiz* (polonicê *Ruch Kukiza*) eo assequitur, ut homines sibi assentiantur *referendum* postulanti, quod in dubium vocat credibilitatem gubernationis polonicae. Haec enim pars politica dicit: ‚Illi (gubernantes) dicunt a se non receptum iri profugos. At nos illis non credimus. Faciamus referendum, quo illi cogantur, ut hanc rationem politicam, quam promiserunt, in fine reverâ adducant ad effectum. Haec res non est tam simplex...

**His verbis ALEXANDRA RYBINSKA Polona diurnaria
Germanae moderatrici televisificae explicat,
quomodo operetur democratia**

<https://www.youtube.com/watch?v=ZaZKsPwVYYU>

ECHUS ET EPISTULAE

Hannes Demming Leoni Latino s. d.

s. v. b. e. e. v.

deliberanti mihi hodie, quomodo epistula Leonina centesima quinquagesima accepta gaudium meum exprimere tibi possim, in mentem venit me saeculo vicesimo aliquando discipulis meis Germanicum de voluptate migrandi cantum Latine reddidisse, quem tunc maxima voce cantaverunt.

en hic habes quattuor illius cantus strophas. quas ne repudies quaeso.

una cum mea pro tot excellentibus epistulis Leoninis laudatione tibi mitto chronogramma anni currentis, quod ne animo nimis critico legas exopto.

fac ut valeas!

multis cum salutationibus Guestphalicis Ioannes histrio

datum Monasterii a. d. XI. Kal. Febr.

de pistoria voluptate migrandi

(Das Wandern ist des Müllers Lust...)

(cantus Germanicus popularis Latine redditus
modulis bene notis fortiter cantandus)

1. pistori praebet gaudia,
pistori praebet gaudia migrare.
est dubium an pistor sit,
quisquis repudiaverit
per silvas, campos, vineas migrare.
2. ab aqua nos didicimus,
ab aqua nos didicimus migrare.
quae non quiescit, quae non stat,
migrandi cui nusquam sat.
quam imitemur! volumus migrare.
3. et amant saxa, lapides,
et amant saxa, lapides migrare.
ruendo vel celerius
quam Lupia noster fluvius
moventur. numquam desinunt migrare.
4. sodales, heia incipite,
sodales, heia incipite migrare!
ad finem usque nostrum sit
– quo nos laturum sit quis scit? –
per vitam cum laetitia migrare!

Hannes Demming f.

**CHRONOGRAMMA
IN EPISTULAM LEONINAM
CENTESIMAM QUINQUAGESIMAM
SCRIPTUM**

TIBI

LEONI LATINO

INGENIOSO EXPERTOQUE PRAECEPTORI

QVI CENTVM QVINQVAGINTA

EPISTVLIS LEONINIS

NOS DONAVISTI

GRATIA & GRATVLATIO

Hannes Demming f.

József Kovács

Mon, 29 Jan 2018 16:19:13 +0100

HONORATISSIME DOMINE GROSS,

UT SEMPER LEGI EPISTULAM SUPREMAM MAGNA CUM ANIMI VOLUPTATE. NOLO IN PUSILLIS OCCUPATUS VIDERI, CUM DICO PAGINÁ XVIII - '...ANNO 1878 LIBRO HUNGARORUM FATALI...' - ANNUM FALSUM ESSE. RECTE EST 1848, CUM PUGNA NOSTRA PRO LIBERTATE SUSCEPTA INITIUM CEPIT. VALEAS QUAM OPTIME

IOSEPHUS FABER

Optime Domine,

nonnullas cogitationes in responsio ad litteras Tuas communicare conor.

Lapsus magni momenti ex stultia ortus est, quem potestates, que victores bello mundano primo discesserunt, commiserunt.

Victores se gesserunt sicut Brennus ille Gallus Roma capta egerat.

Suae privatae utilitati servientes, quorum oculi non longe conspectum ferunt, ut vi operta et symbolica utar, patriam i. e Europam ad exitium vocavere, sicut exemplum Germaniae docuit, quo semen malorum omnium nazimi bellique mundani proximi severunt.

Non aliter se gesserunt sortem acerbam fatumque Imperii Austro-Hungarici disceptantes et definite decernentes.

Imperium singulare, quod Monarchia Austro-Hungarica dicitur, quamquam simultatibus domesticis afflictum et recentiorum temporum condicionibus accomodatione egens totum quiddam oeconomicum cultumque humanum civilemque communem valuit. Rebus oeconomicis destructis et moribus, legibus et ingenio sincero integroque non iam servatis dissensiones atque inimicitiae inter civitates novas et artifice creatas supra modum existerunt. Quam *fortuna tota* nobis relicta magnam vim habet his diebus quoque disceptatio illa. Consociatio Europaea putabatur bonam spem pacis et concordiae praebere, ut hymnus eius verbaque magnifica Schilleriana id consilium exprimunt.

Timeo ne spes ad irritum redacta sit. Post exitum Britanniae tessera insignis coniuncti Austriae et Hungariae i.e *indivisibiliter ac inseparabiliter* in Consociatione Europaea ipsa non iam valet.

Eo tempore voluntate propositoque Praesidis Wilson haud neglectando neglecto omnibusque rebus sanis omissis suspiciones stultae, que plerumque ab hominibus rerum civilium peritis - vel potius *imperitis* - utilitatis suae causá inter gentes novarum civitatum foventur.

Miror offensione viros rerum civilium peritos, qui multum auctoritate et potentiá valent et negotio ingenio exercere dicuntur, de *virtutibus Europaeis* praedicare, dum *virtutes illae* vix vigent, saltem varie vel omnino non definiuntur.

Aestimatio contraria, quae valet et viget, ad gentium populorumque universorum mutationem sedium pertinens statum Europae moribundae bene illustrat.

Egomet spem et fiduciam habeo erga conatús virorum talium qui nunc e.g. in Austria et in Hungaria munere funguntur. Confido iis officium diligenter administrantibus. Spero a fiducia non decepturum esse.

Ceterum Primus Administratorum Hungarus non solum verbis sed etiam factis nihil dubii reliquentibus se praebuit in longum consulere quod spectat futura Hungariae in Europa quadam fundamento firmo cuiusdam cultús civilis communis a maioribus antiquitus traditi aedificata, quae rebus externis non exoptatis se arcere potest, ne opus commune dilabatur.

Miror me forte lumina oculorum amississe vel mente captum esse nuntiationes longe lateque in partibus Occidentalibus de rebus Hungariae legentem. Forsitan non hac in civitate vitam degam...

Licentiam mihi adsumo cogitationem ineptam et *mirum inventum serum dicteriaque* Tibi dicam.

Iosephus, eo nomine secundus, imperator Austriae et Sacri Imperii Romani Nationis Germanicae et rex Hungariae bona sed cassa voluntate et contentionibus inanibus conatus linguam Theodiscam ut linguam unam et publicam in regnis et provinciis omnibus instituere eventum nullum sed hostes infensos sibi adeptus est .

Diaeta Hungariae, i.e. Conventus Nationis, etiam bona sed inconsiderata voluntate anno MDCCCXLIV linguam Latinam quam linguam publicam Regni abhinc saeculis multis vigentem sustulit et linguam Hungaricam quam linguam unam publicam instituit.

Vicem illius quanto utilius fuisset pro ratione commoda et consensionem concordiamque inter gentes Regni tuendi linguas diversas gentium florere sinere et eodem tempore, saltem in Hungaria, non solum pro hominibus eruditione ornatis, qui plerumque numero nobilitatis relati sunt, sed etiam pro multitudine hominum institutione publica efficaciter et fortiter haud inter paucos lingua illa, quae nemini lingua paterna fuit, docta esset.

Iuvat me somnia fingere quantulacumque ea essent.

Valeas quam optime !

Iosephus Faber

PS.: Indulgentiam Te rogo pro erroribus haud dubie multis. Sum qui studia linguae Latinae ad voluptatem tantum exercet !

2018-01-29 19:21 GMT+01:00 SPQR <SPQR@leolatinus.com>:

Care Iosephe,

summas gratias tibi ago pro correctura, quam proxima in epistula publicabo.
Sed quid sentis de Victore Orbano deque Sebastiano Kurzio?

Nonne nova monarchia Danubiana (Austriaco-Hungarica) est exspectanda?

Vale semper, mi Hungare spectatissime!
Medullitus te salutat

LEO LATINUS

**EPISTULA ACULEATA
DE ORBANI „DEMOCRATIA ILLIBERALI“ SCRIPTA**

Die Solis, d.28. m.Ian. a.2018, h.18:56:13

Lieber Herr Dr. Groß, bitte nehmen Sie mich aus dem Verteiler.

Ich mag nichts von einem Menschen lesen, der sich dazu bekennt, die Freiheit aus einem europäischen Staat zu beseitigen, und der dies noch mit dem Euphemismus "Illiberale Demokratie" bezeichnet. Ich verabscheue diese Tendenzen, die sich von Polen über Ungarn bis in die Türkei zeigen, zutiefst. Egal, was man über die Richtigkeit oder die Fehlerhaftigkeit des deutschen Umgangs mit den Flüchtlingen denken mag. Freundliche Grüße N.N.

**QUIDAM LECTOR OCCUPATIOR EST, QUAM UT
LEGAT EPISTULAS LEONINAS**

Mon, 15 Jan 2018 12:14:34 +0000

Leoni Latino salutem dicit plurimam Fidelis Raedle. Gratias tibi ago quam maximas pro epistolis tam benigne oblatis, sed quia mihi tantis laboribus obruto tempus non est, ut tot textus perlegam, te precor, ne epistulas tuas ad me mittere pergas. Vale! Tuus Fidelis Rädle

d. Veneris, 26 m.Ian. a.2018 h.16:46:26

Exornatissime ac doctissime Director,

quaerere mea de "**Bibulis vinis**" Cantum XIII - Codex Latinus
Monacensis Vobis subicere volo.

Gratus sum Vobis pro pulcherrimo libello confecto in quo sunt scripta mirabilia.

Salutem Vobis dico,

Johannes Teresi

Bibulis vinis

*In taberna quando sumus,
non curamus quid sit humus,
sed ad ludum properamus,
cui semper insudamus.*

*Quid agatur in taberna
ubi nummus est pincerna,
hoc est opus ut quaeratur;
si quid loquar, audiatur.*

Quidam ludunt, quidam bibunt,
quidam indiscrete vivunt.
Sed in ludo qui morantur,
ex his quidam denudantur,
quidam ibi vestiuntur,
quidam saccis induuntur;
ibi nullus timet mortem,
sed pro Baccho mittunt sortem.

Primo pro nummata vini;
ex hac bibunt libertini;
semel bibunt pro captivis,
post hæc bibunt ter pro vivis,
quater pro Christianis cunctis,
quinquies pro fidelibus defunctis,
sexies pro sororibus vanis,
septies pro militibus silvanis.

octies pro fratribus perversis,
 nonies pro monachis dispersis,
 decies pro navigantibus,
 undecies pro discordantibus,
 duodecies pro pænitentibus,
 tredecies pro iter agentibus.

Tam pro papa quam pro rege
 bibunt omnes sine lege.

Bibit hera, bibit herus,
 bibit miles, bibit clerus,
 bibit ille, bibit illa,
 bibit servus cum ancilla,
 bibit velox, bibit piger,
 bibit albus, bibit niger,
 bibit constans, bibit vagus,
 bibit rudis, bibit magus,
 Bibit pauper et ægrotus,
 bibit exul et ignotus,
 bibit puer, bibit canus,
 bibit præsul et decanus,
 bibit soror, bibit frater,
 bibit anus, bibit mater,
 bibit ista, bibit ille,
 bibunt centum, bibunt mille.

Parum sescentæ nummataæ
 durant cum immoderate
 bibunt omnes sine meta,
 quamvis bibant mente læta;
 sic nos rodunt omnes gentes,
 et sic erimus egentes.
 qui nos rodunt confundantur
 et cum iustis non scribantur!

**Cantum XIII - Codex Latinus Monacensis (Monaci, in Abbatia
Benediktbeuren)**

Invenit Johannes Teresi

ECCE LIBRI LEONIS LATINI

Permittas, quaeso, ut nuntium adiungam minus gratum: pretia discorum, qui a Leone Latino praebentur vendendi, ex decennio (sic!) non exaucta - proh dolor – nunc valdê augenda sunt (denis euronibus). Interim enim cum pretia materiarum quoque multo exaucta sint, tum praecipuê disci libellique discis subiungendi non conficiuntur neque involvuntur nisi magno cum labore.

Restat, ut afferam titulos pretiaque librorum typis impressorum, qui hōc tempore apud Leonem Latinum prostant venales:

- | | |
|---|---------|
| 1) CRABATUS (Otfried Preußler, Krabat)..... | 49,00 € |
| 2) FRAGRANTIA (Patrick Süskind, Das Parfum)..... | 42,00 € |
| 3) RECITATOR (Bernhard Schlink, Der Vorleser)..... | 45,00 € |
| 4) HOTZENPLOTZIUS (Otfried Preußler, Der Räuber Hotzenplotz)..... | 25,00 € |
| 5) ARANEA NIGRA (Jeremias Gotthelf, Die schwarze Spinne)..... | 22,00 € |

PARVUS NICOLAUS (René Goscinny, Le Petit Nicolas) non êditur in domunculâ Leonis Latini, sed in Aedibus Turicensibus, quae appellantur «Diogenes».

GLOSSARIUM FRAGRANTIAE et PERICULA BARONIS MYNCHUSANI – proh dolor! – sunt divendita. Utinam nobis contingat, ut aliquando edantur iteratis curis.

Habeas nos excusatos, quod situm interretialem (i.e. anglicê »website« nondum restauravimus novaque pretia ibidem nondum indicavimus.

Ceterum, cara Lectrix, care Lector, bene scias oportet Leonem Latinum non esse megalopolium, quo – ut ita dicam - rapidissimê eiectantur multae myriades librorum vilissimae, sed domunculam potius virtuaalem quam realem, in qua creantur κειμήλια, id est res parvae et rarae et carae. Res parvae enim sunt disci compacti aut libelli typis editi palmares; rarae sunt editiones, quae centuriam tantum complectantur exemplorum; carae sunt hae res omnes, quia cordi sunt Leoni Latino recordanti horas illas innumeras, quibus operam dedit illis creandis.

Cara Lectrix, care Lector, utinam omne opusculum a Leone Latino confectum sit Tibi KTHMA EΙΣ AEI.

INDEX DISCORUM LEONIS LATINI

NR	Num. mandata-telae	ISBN	TITULUS	AUCTOR	TRANSLATOR	ANNUS	FORMA	AMPLI-TUDO	PRE-TIUM
1	00104	978-3-938905-00-5	FABELLA TEXTORIS VERSUTI PALAEOINDICA	Anonymus (Old Indian)	Nikolaus Gross	2004	CD-ROM pdf	7 pp.	€ 17,90
2	00104 A	978-3-938905-15-9	FABELLA TEXTORIS VERSUTI PALAEOINDICA – Libri audibiles	Anonymus (Old Indian)	Nikolaus Gross	2005	Audio	21 min.	€ 22,90
3	00204	978-3-938905-01-2	TRES FABULAE EDGARII ALLANI POE: CATTUS NIGER - RANUNCULUS - PUTEUS ET PENDULUM	Edgar Allan Poe	Nikolaus Gross	2004	CD-ROM pdf	33 pp.	€ 27,50
4	00304	978-3-938905-02-9	ANECDOTA REI PROXIMO BELLO BORUSSICO FACTAE	Heinrich von Kleist	Nikolaus Gross	2004	CD-ROM pdf	6 pp.	€ 17,90
5	00304 A	978-3-938905-16-6	ANECDOTA REI PROXIMO BELLO BORUSSICO FACTAE – Libri audibiles	Heinrich von Kleist	Nikolaus Gross	2004	Audio	6 min.	€ 20,90
6	00404	978-3-938905-03-6	MEMENTO MORI	Alexander Saxon	Nikolaus Gross	2004	CD-ROM pdf	7 pp.	€ 17,90
7	00404 A	978-3-938905-17-3	MEMENTO MORI – Libri audibiles	Alexander Saxon	Nikolaus Gross	2005	Audio	20 min.	€ 21,90
8	00504	978-3-938905-04-3	DE CRAMBAMBULO	Marie von Ebner-Eschenbach	Nikolaus Gross	2004	CD-ROM pdf	14 pp.	€ 19,50
9	00604	978-3-938905-05-0	DE DINOSAURIS	Nikolaus Gross	-----	2004	CD-ROM pdf	16 pp.	€ 19,00
10	00704	978-3-938905-06-7	SUDATORIUM VENERIS	Diogenes Anaedouus	-----	2004	CD-ROM pdf	11 pp.	€ 19,50
11	00804	978-3-938905-07-4	PERICULUM FRANCISCI	Diogenes Anaedouus	-----	2004	CD-ROM pdf	7 pp.	€ 17,90
12	00904	978-3-938905-08-1	NUPTIAE ABDERITANAE	Bertolt Brecht	Nikolaus Gross	2004	CD-ROM pdf	21 pp.	€ 22,00
13	01004	978-3-938905-09-8	TESTAMENTUM REYNERI BERLBYN	Henricus van den Lande de	-----	2004	CD-ROM pdf	7 pp.	€ 17,50

				Raelt					
14	01104	978-3-938905-10-4	DE SANCTO NICOLAO DEQUE VIRO NATALICIO	Nikolaus Gross	-----	2004	CD-ROM	21 pp.	€ 22,00
15	01204	978-3-938905-11-1	FABELLAE GRIMMIANAE 1	Jacob Grimm/ Wilhelm Grimm	Nikolaus Gross	2004	CD-ROM pdf	28 pp.	€ 24,90
16	00105	978-3-938905-12-8	ROMULUS MAGNUS	Friedrich Dürrenmatt	Nikolaus Gross	2005	CD-ROM pdf	49 pp.	€ 31,90
17	00205	978-3-938905-13-5	DE THILO CUSTODE FERRIVIAE	Gerhart Hauptmann	Nikolaus Gross	2005	CD-ROM pdf	28 pp.	€ 24,90
18	00305	978-3-938905-14-2	HISTORIA AGATHONIS (LIB.1)	Christoph Martin Wieland	Nikolaus Gross	2005	CD-ROM pdf	15 pp.	€ 19,50
19	00405	978-3-938905-19-7	WERTHER IUVENIS QUAE PASSUS SIT	Johann Wolfgang von Goethe	Nikolaus Gross	2005	CD-ROM pdf	82 pp.	€ 38,90
20	00505 A	978-3-938905-22-7	CICERONIS ORATIONES IN CATILINAM HABITAE 1 – Libri audibiles	M.T. Cicero	-----	2005	Audio	40 min.	€ 21,90
21	00605 A	978-3-938905-18-0	SOMNIUM SCIPIONIS A CICERONE SCRIPTUM – Libri audibiles	M.T. Cicero	-----	2005	Audio	30 min.	€ 20,90
22	00705 A	978-3-938905-23-4	CAESARIS BELLUM GALLICUM 1 – Libri audibiles	C.I. Caesar	-----	2005	Audio	55 min.	€ 22,90
23	00106	978-3-938905-21-0	AUTOBIOGRAPHIAE LATINAE	Nikolaus Gross	-----	2006	CD-ROM pdf	87 pp.	€ 48,00
24	00206	978-3-938905-20-3	DISQUISITIO CHEMICA ACIDULARUM BERGENSIUM ET GOEPPINGENSIUM	Karl Friedrich Kielmeyer	Nikolaus Gross	2006	CD-ROM pdf	66 pp.	€ 38,00
25	00306 A	978-3-938905-24-1	CAESARIS BELLUM GALLICUM 2 – Libri audibiles	C.I. Caesar	-----	2006	Audio	61 min.	€ 22,90
26	00406 A	978-3-938905-25-8	CICERONIS ORATIONES IN CATILINAM HABITAE 2 – Libri audibiles	M.T. Cicero	-----	2006	Audio	41 min.	€ 21,90
27	00506 A	978-3-938905-26-5	EPISTULAE A SENECA AD LUCILIUM SCRIPTAE 1 – Libri audibiles	L.A. Seneca	-----	2006	Audio (2 CDs)	88 min.	€ 27,90
28	00107 A	978-3-938905-27-2	ASINUS AUREUS AB APULEIO SCRIPTUS	Apuleius	----- --	2007	Audio	55 min.	€ 23,90
29	00207	978-3-	OBSIDIO SAGUNTI A	Livius	-----	2007	Audio	53 min.	€ 23,90

	A	938905-28-9	T.LIVIO DESCRIPTA						
30	00307	978-3-938905-29-6	FABELLAE GRIMMIANAE II	Jacob Grimm/ Wihelm Grimm	Nikolaus Gross	2007	CD-ROM pdf	58 pp.	€ 32,90




**CARA LECTRIX, CARE LECTOR, BENE VALE,
USQUE AD SEPTIMANAM PROXIMAM !**

**HANC EPISTULAM LEONINAM
CENTESIMAM QUINQUAGESIMAM SECUNDAM
SENDEN IN OPPIDULO BAVARIAE SUEBICAE PERFECIT**

Die Dominicâ, 04. m.Febr. a.2018

Nicolaus Groß

Sodalis Academiae Latinitati Fovendae



LEO LATINUS

<http://www.leolatinus.de/>

